



Tir Yimiyim


www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 6

Yangia anidakangma :



TAPAK 8

So-Li-Sü Theatre-i parnok indang jilushi "Sügra" ia sayutsü

Ni asaya nungi anenba ano mesangdong: Mary Kom



VOL. XXI NO. 103 (ADOK 103) DIMAPUR ROGONÜ (FRIDAY)

ANJETI (JANUARY) 26, 2024

₹ 5.00

Nagaland Angh-i R/Day nungtem nung nüburttem ayongzük

Dimapur, Aenjeti/January 25 (TYO): Külem senso ajunga dang 75 buba Republic Day salem abener. Küm 75 süiyogom iba anogo asen India nungeri asen linük indang constitution yanglua agizüksü nangzüka asen sasa asenok ya 'sovereign democratic republic' indang senso ka ama jangjatet, ta Nagaland Angh La Ganesan-i 75th Republic Day nungtem nung agütsüba sangdong nung ashi.

India nunger tetsür aser tebur million aika azü, nüktzü aser asentzü yimdokba ajanga tanü asenoki iba anogomung amunger, shirnoki bendanger yimsüsüba yinzü agi alena aliba nungi asenok sala. Asen linük indang 'founding fathers' aser asen asoshi bendanga agütsür zünger mezünga tetsür aser teburtem nem iba anogo akum agütsüsü langa lir, aser parnoki bendanga agütsüba asenoki kodanga mamatoksüla, ta pai ashi.

Par mangdang, temulungtetba aser tasü aitba ajanga asen democracy atema tamendak dak yangertsü, kong tanü asenoka shilem ka lir.

Tashi tait democratic system amenokba nungi tenzüka republic linük ka ama liyonga arudang küm 75 tsüngta India-i lenla balala nung takok jenti ngutetogo, ta ashi.

Republic linük ka ama India atema tongtipangtiba takokji democratic system amenokba ya ka lir. Oshi-oben, sobaliba aser tamangba yimsü balala aliba linük ka süaka India nung democratic system shidak amshia arur, linük nung teti election timi agia telemtetba agiba maparen nung nüburttemi shilem agir, ta Nagaland Angh-i ashi.

Healthcare, agriculture, transport infrastructure, Science &

Technology, space exploration, pharmaceuticals, Defense densema lenla balala nung asen linük kanga junga renlokba asenoki angur. India rongsenketzüng kanga kera ainba ajanga nisung million aika makamait jenjang nungi ajungketer aser takum libaliru jenjang tajungba kumdaksür. Republic linük ka ama India-i lenla balala nung takok anguba ya loktiliba aser sobaliba terenlok nunga dena lir. Gender equality temaba jenjangi ajungketba, loktiliba nung temenen samadaksüba aser sobaliba tajung wazüka ayuba nunga linük terenlokba lir. Beti Bachao Beti Padhao, Ayushman Bharat, Swachh Bharat Abhiyan, aser Digital India ama sentongtem ajanga nüburttem asoshi temelenshi tajung bener arutsür, ta Angh La Ganesan-i ashi.

Nagaland-a Indian union ung state ka ama kumtetba sülen terenlok jeni lir. State-i tayongzüka jenjang ajangtetogo aser education, economy aser ki o jen densema wadang balala nung terenlok lir. Sobaliba tajung wazüka ayuba nunga Nagaland-i mapa tajung inyaka arur, ta ashi.

Asenoki asen konang-nüngsang nung tenük sünger anizüngzüka melile saka tarutsü nung jenjang tajungba tongtetsü meranga inyakti, ta pai ayongzük.

Rongsenketzüng kera aintsü asoshi nungdakba ki o jen aser lenmang tesendaktep nung metokmeperi aliba asenoki angatetti, ta ashi.

Asen senso ajunga dang Vikshit Bharat 2047 nükjidong tongtetsü asoshi inyaktüsü ayongzük. Telungjem, temulungtetba aser tangatetba tajung nung asenok külemi jajati, ta Nagaland Angh-isa ashi.

FMR agienba nung timtem tuluba lir: JU(U) Nagaland

Dimapur, Aenjeti/January 25 (TYO): Janata Dal United Nagaland state unit metetpelaba senden ka state executive aser district ketdangürtem den January 25, 2024 nü Hotel Seb Tower, Dimapur nung mena liasü. Iba senden nung tawa Central sorkari Free Movement Regime agientsü telemtetba agiba onük jembia liasü.

Akhi mapang nungi Free Movement Regime ajanga nüburttem tsüngta tesendaktep nung tajangzük jenti nguogo aser kidanger linük ana tsüngta shishilempaba tsütsü tesendaktep tajung lia aru, aser FMR agientsü telemtetba agiba nung nüburttem den junga shisa agitepba mesüra mulungsensü teindang nung inyakba majiteter, ta JD(U) Nagaland state unit tongti zülur Imsumongba Pongen-i sangdong ka ajanga ashi.

Linük ana tsüngta sobaliba melentepba aser regional integration nung Free Movement Regime yagi tongti shilem agia lir.

Putu aika amshia aruba "Free

Movement" ajungbena agientsüba lemtetba ajanga talenba makai mesüra tebilemetsü makai arütsü alema senzüa tajangzük angurtem takum nung kanga mejungi kongshir.

Central sorkari ajungbena Free Movement Regime agienba ya kasa nisung tsüngta telemsa adokdaksüba den sako aser iba yagi aisü nung tetsükdaksü ajurutsü, ta sangdong ajanga ashi.

Anungji onoki central sorkar dang iba telemtetba tanaben asadangshitsü ajungshir aser linük ana tsüngta tesendaktep nung timtem ajurutsü aliba aser India aser Myanmar nüburttem mapang talangka nungi sendaktepa aruba indang bilema inyaktüsü ayongzük, ta JD (U) Nagaland state unit sangdong ajanga ashi.

Nüburttem den tema nung jembishinü akatsüla, talenba makai senzüsempongba nung mokongshii iba melen lenmang danga kar bushitsü ayongzük, ta sangdong ajangasa ashi.

Nagaland nung Republic Day amungba live sayutsü

Dimapur, Aenjeti/January 25 (TYO): Linük ajunga den külemi Nagaland nunga 75th Republic Day ya January 26, 2024 nü Kohima nung aliba Nagaland Secretariat Plaza nung amungtsü.

Department of Information & Public Relations ajanga iba sentong ya DIPR Nagaland YouTube https://www.youtube.com/live/t3ztVasuwLI?si=pvu9bcptkHFVEJCL nung live sayutsü.

State Level 14th National Voters Day mungogo



St. Joseph's College Jakhama nung January 25, 2024 nü State Level 14th National Voters Day amungba mapang tesemdanger tongti, Kesonyu Yhome, IAS (abelen)-i o jembidang tangokba noksa nung angur. (Achichi) St. Joseph's College Jakhama nung State Level 14th National Voters Day amungdang National Voters Day Pledge agiba noksa nung angur.

Dimapur, Aenjeti/January 25 (TYO): Nagaland indang Election department ajanga St. Joseph's College Jakhama den lungjemer January 25, 2024 nü Indoor Stadium St. Joseph's College Jakhama nung "Nothing like voting, I vote for sure" omen kübok State Level 14th National Voters Day munga liasü.

Iba sentong nung tesemdanger tongti ka ama jembidang, tanü asen democracy nung tayongzüka tulutiba rongnung kaji tangatetba shidak aser vote agütsüsü temeden shidak lir sernung vote magütsüba ya lir, ta Kesonyu Yhome, IAS ajanga ashi.

EPIC aliba ya TV remote amba amai lir, anungji telemtetba agia melentsü asoshi voter nem tashi agütsür ta pai ashi.

National Voters Day amungtsü asoshi St. Joseph's College Jakhama ama kaket reju dang tesem tajungba mali, kong kin ajanga nungi azünger, ta Chief Electoral Officer, Vyasan R, IAS ajanga iba sentong nung ashi.

CEO-i kaketshirtem aser voters tem dang pei franchise

amshitsü atema tsübova melie pei vote agütsüsü ayongzüka liasü.

Election maparen ya onsara tulu lir, aser election takok ngua agitettsü asoshi voters densema stakeholders ajak tongtipang shilem lir, anungji voters tem temai adoka democracy benjong nung shilem agütsüla, ta pai ashi.

Iba sentong nung Deputy Commissioner & District Election Officer, Kohima, Kumar Rammikant, IAS ajanga National Voters Day indang nükjidong lemsatetpang, linük ka aintsü aser tejakleni aotsü atema democratic set up nung vote ajak azünger, ta ashi.

Pai voters dang linük nung election inyakyim metettsü aser meteta aliba voter ka akumtsü ajungshir aser aruya aliba Lok Sabha election nung ajaki pei franchise amshia vote agütsüsü ayongzük.

Iba sentong nung State PwD Icon Ashe Kiba aser Principal, St. Joseph's College, Jakhama tenung nung Fr. Dr. George Angami nati o tatsütsü jembia, State SVEEP Icon Aseto Zao aser Vinika Yeptho nati SVEEP theme song aten.

Chief Election Commissioner of India ajanga züluba shiti ka screen nung sayua liasü.

Kasa sentong nung Electoral Literacy Club, St. Joseph College ajanga temeja ken ka aten, CEO ajanga National Voters Day pledge ketdangüsü agi aser vote mezünga agütsüsüpür nem sempet agüja liasü.

Addl. CEO Awa Lorin-i pela agizükba o jembia aser Toshimeren Aier Dy. CEO ajanga melepzüng o jembia.

Iba sentong ya National Anthem tena tenzük aser telemsa balala nung sempet yamai agütsü.

State level nung Best State Level BLO sempet ya Moanungsang P/T GPS Mongsenbai, Mokochung nem agütsü, Best Campus Ambassador sempet ya Chingpai N Konyak, BA 2nd Semester Economic Department, Patkai Christian College nem agüja liasü.

District level nung Best BLO sempet ya Zasekuolie, Zakieneituo Zumu, Kevihelie, Kevilelie Zhale, Kedosieto Sophie aser Kroneicho Tase nunger nem agüja liasü.

FMR ajanga Naga nunger tsüngta telemsa tali adokdaksütsü: NSF

Dimapur, Aenjeti/January 25 (TYO): India-Myanmar arütsü atsüdagtsü telemtetba agiba indang Union Home Minister Amit Shah-i January 20, 2024 nü sangdongba khukhua aitsür, ta Naga Students' Federation (NSF) sangdong ajanga ashi.

India aser Myanmar tsüngta tang aliba Free Movement Regime (FMR) nokdangtsü renema aliba ajanga Naga nunger tebilemetsü tulu akar, shirnoki akhi mapang nungi tashiyim amshia telemsa adokdaksütsü merangba timtem ajangshia arua lir.

Government of Nagaland-i süoki ia iba ken o jembiba pela agizükker aser Free Movement Regime magientsü atema central sorkar den maneni jembishinütsü sorkar dang ajungshir, ta NSF sangdong ajanga ashi.

Free Movement Regime ya Saramati tenem anatsülen aliba Naga nunger tesendaktep asoshi tongtipang apu ka amai lir.

FMR agienba ajanga akhi mapang nungi tesendaktep aliba nung timtem agütsüsü.

Delhi nung yimtenren tsütsü nükjidong ataloktsü mechi kija mesüra political entities temi

tajangzük mebushtsüla. Mapang tatsüka asoshi yimtenren tsütsü tajangzük agitsü mechi Naga nungeri pei sasa yimsü süa alitsü tejangraba aser asen temeden memelendoktsüla, ta NSF sangdong ajanga ashi.

Ajaki Naga nunger ajungtsü aser Naga nungeri aginüba mezüng sür inyaktüsü ajungshir, ta ashi.

Dangari tapi agi lemsatsüba ajanga Naga nunger mapang talangka timtema arur aser ano Naga nungi tali lemsaa aser atsüdagtsü merangra, ajibo asen temeden aser autonomy tangatetba yirutsür ama asütsü, ta Naga Students' Federation tir Medovi Rhi aser tongti zülur Chumben Khuvung nati sangdong nung ashi.

Free Movement Regime agientsü tawa telemtetba agiba yagi temulung anisüngzük magütsür, kechiaser India ya alima nung tashi tait linük aser United Nations Declaration on the Rights of Indigenous Peoples 2007 (UNDRIP) nung meyongnem agütsür ka lir.

UNDRIP indang Article 36 nung international borders agi

sadanger aliba lisopur temden jangja-jangja agizüka lir aser maparen balala atema arütsü alema oa tesendaktep yangertsü shia lir.

Kilometre 1,643 talang India-Myanmar arütsü ya Mizoram, Manipur, Nagaland aser Arunachal Pradesh ajanga aor, kong kin balala aser puti otsü aika lir.

Anungji NSF-i India sorkar dang iba telemtetba tanaben asadangshia Naga nunger den jembishinü akatsü ajungshir, ta NSF ajanga ashi.

Ozü 'historical rights' akumtsübotsüba dang masü saka lisopur temden wazüka ayutsü India sorkari alima dang sangdonga aliba ama inyaktüsü kanga tongtipang lir.

Naga nunger li nung nisungi arütsü yanglua yimtenren tsütsü tejangraba nung ajemdkar Naga nunger tali telemsa adokdaksütsü merangba memelatsü.

Iba ken o jembishinü aser tangatetep nung Naga nunger lisopur temeden aser puti otsü akumtsübova state aser central sorkar lungjemer inyaktüsü ajungshir, ta NSF sangdong ajangasa ashi.

Mokokchung nung National Voters' Day mungogo



January 25 nü DC Conference Hall, Mkg nung NVD sentong agiba mapang DC Thsuvisie Phoiji den ketdangsürtem, BLO tem aser voter tasen tem tangokba noksa nung angur.

Dimapur, Aenjeti/January 25 (TYO): Linük ajunga den jangyu medema Mokokchung district nunga "Nothing like voting, I vote for sure" omen nung ajemdaker January 25 nü DC Conference Hall, Mokokchung nung 14buba National Voters 'Day mungogo. Iba sentong nung Mokokchung Deputy Commissioner (DC) Thsuvisie Phoiji alakteta jaoker liasü.

Sentong nung o jembiba mapang Thsuvisie Phoiji-i, tawa züngoksema voter ajak nem tenüngsang agütsü aser parnok dang yimsüsüba tajung ka asoshi aser state atema parnok nükla ataloktsü atema parnok indang franchise amshitsü ajungshia liasü.

Pai ashiba agi, democracy ya pei indang vote agütsüsüba atema dang masü, saka temsüa aliba voter tem ajaki parnok tenüng züngoksema kodang ka

danga sentoka metoktsüli idangji democracy tanüla chichibaji jungkai adoker.

State legislative body nung tetsürtemi shilem agiba indang jembiba mapang pai, tetsürtem dang election inyakyim nung shilem agitsü aser district aser state tenüng nung nokdaksü ajungshi. District Election Office tenüng nung Deputy Commissioner-i, democratic inyakyim tajungba kümdaktsütsü atema E Rolls merketba aser temsüa aliba voter tem ajak züngoksemsü assohi jenjang tapet agiba atema BLO ajak dang kanga pelaba lemsatep. Maneni pai achaayanga voter tem tenangzüktepba agi.

National Voters' Day amungba anogo 2023 küm asüba BLO asem nem aküm tetushia agüja liasü.

Sentong nung BLO tajungtiba 10 nem naroküm

agütsü aser parnok mapa tajung asoshi kuli kakat den senpet agüja liasü.

Iba sentong ya Assistant Election Officer, Mokokchung Renben Mochhui lenisüba nung agi aser Dr Limasenla Jamir DLMT aser Asst.Prof. FAC-i, "Nothing like voting, I vote for sure" omen nung ajemdaker jembia liasü.

Maneni sentong nung SDO(C) Hq aser Nodal Officer BBBP Abeinuo Jasmine Ashao-i "Beti Bachao Beti Padhao" dak sendakba nung jembia liasü.

National Voters' day ya kümshia voter tasemtem ajungshitsü aser parnok nem teyari agütsütsü atema amunger. Iba anogo voter tem nem tangazükba balala agütsür. Iba sentong ya EAC Mokokchung Hq. Vitolu-i tepela o jembir tembang liasü.

Kohima Press Club-i asükhu lemsatep

Dimapur, Aenjeti/January 25 (TYO): Kohima Press Club-i sangdong ka ajanga osangbener tejen aser taoba Press Club tatong tir Eric Miachio asüba osang angazüka mang ayimba lemsatepogo. Pa January 25 nü iba ali wadang tembangogo.

Osangbener ka ama pai osang tongtibang aika aika ayimjema osang agütsüogo, kong talisa lokti libaren, yimden yimsüsüba aser Indo-Naga ken o densema lir.

Pa 2010 küm January 25 nü Kohima Press Club tatong tir asütsü shim aser 2012 küm tashi inyaka liasü. Pai Press Club terenlok atema bendanga agüja inyakba atema kanga menungra

bilemteter.

Pa asüba ajanga tembar aser kümlem tenzüker tajung ka samaogo, shiba kanga ajemalu, ochishir aser tetemjen nisung ka liasü. Pa asüba ajanga tawa adokdaksüba ya aikati metettsü aser onoki maneni pa mapa tajung menungra bilemtettsü.

Onoki taoba tatong tir nem aküm tetushi agütsür aser asür kinungertem den asükhu lemsatep. Tulusang tsüngremi asür tanüla teti tatem makadak anisüngzükdakjang ta aser asür kinungertem nem anisüngzükgüjang ta sarasademtsür, ta tir Alice aser General Secretary Vishü nati kümlem sangdong ka ajanga metetdaksü.

FAC nung National Voters Day mungogo



Dimapur, Aenjeti/January 25 (TYO): Linük ajunga nung National Voters Day amungba anogo Department of Political Science, Fazl Ali College-i ayongzüka college nunga sentong ka agiogo. Iba sentong omen "Nothing like Voting, I Vote for Sure" dak sendakba nung o jembiba mapang Asso.

Professor Lipokrenla Jamir-i, vote agütsütsü asoshi voter shia-i telemtetba agitsü aser iba indang osang prokshitsü asoshi shilem agitsü koda tongibang

iba indang lemsatepa liasü. Laisa, sorkar aser democracy ya voter temi shilem agiba dak metaloker lir ta ashi. Sentong nung shilem aitem dang taruba election nung shilem tajung agitsü lai ajungshia liasü.

Iba sentong ya sentong nung shilem agirtem tenangzüktepba agir tembang liasü. Sentong nung college nung tesayurtem, non-teaching staff aser kaketshirtemi shilem agia liasü.

Programme for

CELEBRATION OF 75th REPUBLIC DAY

ON 26th JANUARY 2024 AT NAGALAND CIVIL SECRETARIAT PLAZA, KOHIMA

0600 hrs : Unfurling of National Flag in all Government Offices, Institutions/ Public & Private Buildings.

0850 hrs : Review of Parade by DGP, Nagaland.

0900 hrs : 1. **Hon'ble Governor** arrives, unfurls the National Flag, receives Rashtriya Salute and inspects the Parade.
2. Address by the Hon'ble Governor.
3. Presentation of Awards.
4. March Past.

PARADE CONTINGENTS:

- 13 Assam Rifles Bn
- 78 CRPF Bn
- 37 BSF Bn
- DEF Kohima
- 4th NAP Bn
- 5th (IR) Bn Mizoram
- 10th NAP (IR) Bn
- 15th NAP (IR) Mahila Bn
- Home Guards & Civil Defence & SDRF
- Ex-Servicemen
- 1 Naga Girls Bn NCC, Kohima
- Kohima College
- NPTS Brass Band
- Nagaland Police Auxiliary Brass Band
- 15th NAP (IR) Mahila Bn Pipe Band
- 13 Assam Rifles Bn Pipe Band

Parade Commander : **Shri. L. Impung Chang**, NPS, Dy. Commandant, NAPTC
2nd in-Command : **Km. H. Pongloi**, NPS, AC, 2nd NAP Bn Alichen

CULTURAL PRESENTATION :

1. **Dance Performance** : "Jigra" (Women Resources Department)
2. **Cultural Troupes** : Art & Culture Department
 - a) Angami, Burgeon Society, Chedema : Indigenous Game
 - b) Pochury Cultural Troupe, Kohima : Indigenous Game
 - c) Lotha, Yachummaro Cultural Troupe : Folk Song
 - d) Phom, Bhumnyu Cultural Troupe : Folk Dance
 - e) Sangtam Women Cultural Troupe : Folk Dance
 - f) Zeliang Cultural Troupe, Kohima : Folk Dance

INAUGURATION OF EXHIBITION STALLS BY THE HON'BLE GOVERNOR

VISIT OF INSTITUTIONS BY CHARITABLE ORGANIZATIONS

1. State Mental Health Institute : Gorkha Public Panchayat, Kohima
2. Kohima Orphanage & Destitute Home : Hindu Mandir, Kohima
3. District Jail, Kohima : Kohima Chamber of Commerce & Industries
4. Kevi Children Home, Lerie Colony Kohima : Rotary Club, Kohima
5. NHAK : Nagaland Motorcycle Club, Kohima Chapter
6. Good Samaritan Senior Citizen's Home, Meriema : Puliebadze Club, Kohima
7. Bright Morning Star Orphanage Perizie near IG Stadium : Nagaland Contractor & Supplier Union
8. Leprosy Colony-Naga Bazar : Indian Red Cross Society, Kohima
9. Kripa Foundation : Nagaland Adventure Club, Kohima
10. Cradle Ridge : Hindu Kalyan Samiti, Kohima
11. Mount Gilead Home : Classic Club, Kohima

Distribution of Sweets at Parade Ground by Dobashis of DC Office, Kohima

EVENING PROGRAMME AT SECRETARIAT PLAZA

1430 hrs : Football Exhibition Match : Secretariat XI Vs DC XI

1600 hrs : Prize Distribution

1615 hrs : Band Display

1. 13 Assam Rifles Bn Pipe Band
2. NPTS Brass Band
3. 15th NAP (IR) Mahila Bn Pipe Band
4. Nagaland Police Auxiliary Brass Band

BEATING OF RETREAT

J&K police 72 aser sepai 119 nem tasü aitba awards agütsütsü

New Delhi, January 25 (Agencies): Republic Day atongtsü anogo ka lia Brihostibarnü Ministry of Home Affairs (MHA)-i Gallantry & Service Medals angutsüpurtem tenüing sangdongogo.

Guard, Civil Defence & Correctional Service nungi sepai 1,132 nem Gallantry and Service Medals agütsütsü, ta MHA-i metetdaksü. Sepai ana nem President's Medal for Gallantry (PMG) medal agütsür aser sepai 275 nem Medal for Gallantry (GM)

medals agütsür, ta MHA-isa metetdaksü. Gallantry Awards 277 angurtem rongnungi sepai 119 bo Maoists telungpurtemi timtem agütsüba tesem nungi lir, Jammu & Kashmir region nungi sepai 133 aser tanga region nungi sepai 25 nem tasü

aitba awards agütsür, ta MHA-isa metetdaksü. President's Medal for Distinguished Service (PSM) sepai 102 nem agütsür, iba nungjagi medal 94 police service atema, medal pezü Fire Service atema aser medal pezü Civil Defence and Home

Guard Service nem agütsür. Medal for Meritorious Service (MSM) sepai 753 nem agütsür; iba nungjagi medal 667 Police Service, medal 32 Fire Service, medal 27 Civil Defence & Home Guard Service aser medal 27 Correctional Service nem agütsür.



Senso ajak den salem lemsateper

75th

Republic Day

“

Iba ya India terenlok indang 'Amrit Kaal' lir. Tanü Bharat nung lanurtem tashi molamoshir. Tanü asenok tashi ajanga meranga inyakba ajak agi taruba küm meyirjang aika atema Bharat tamendakdak tashi itdaksütsü.

- Narendra Modi

”



Anepdang 9:00 ano nungi tenzüka Kartavya Path nungi Republic Day benjungmong amongba sentong Doordarshan network nung 'live' sayutsü.



TIR YIMYIM YIMOBILEM (EDITORIAL)

DIMAPUR ROGONÜ, JANUARY (AENJETI) 26, 2024

Tamapur tesü !

Asenok dang ochishia aser meimtepa alitsü sayuba tamangba yimsü tajung agizüker küm noklang ka ser tesadang dak tali süia amanga aruba mapang ka nung, Nagaland nung asenok Aor yimsüsür aser lokti lenirtemibo yi yokner saka tangar Chakhesang kin ama, tanü putu nung mapa ajak nung tatishitsü tajung sayua litetba kin nungi adokba yimsüsüribo yi ayokba nungi sen aika anguyonga, Nagaland nung yibosa mayoktsüla ta par kin lokti senden nung metetdaksübaji tesüpur agi tamapur aser tamapur agi tesüpur akümba mapa ka asütsü. Aji oda, asenokibo Nagaland nung yi mayokba agi chi chiyonga athitsü amai bilemer südi aser Nagaland nung mozümora achiba, tashidak tamajung adoka asüba aser balalulaba ajak asenokibo yi mayokba dak atonger. Aji oda, Nagaland nung yi ayok nungbo mozümora achir mali akümtsü, Nagaland nung ayokba yi agibo temang nung tashidak mekaotsü aser yi yokra tanurtema achiajem nung kanga azüoka akümtsü amai asenoki jembir. Ajisüaka, kasa Nagaland government nung CAWD & Taxes department nung Advisor Chakhesang nung Kudecho Khamo-ibo yi ayokba nungi sen arutsü nükshibaji asenok ajak atema tatidang tuluka lir, sen aika anguba dang nungibo Tsüngrem tsüba aliba nisungang tajungba, anungji niebo yi mayoktsü ozüing lateta akaba ya tatem tashi nungittsü ta Chakhesang Public Organisation lokti senden nung metetdaksübaji alemli Yihusua-i Israel nungertem dang, nenoki koba tsüngrem tenzükner aji nenok mulung saka "ni aser ozü kibongbo Kibubasa tenzüktsü," ta ashiba amai lir. Pai ashiba ama, tanü joko yi mayok maremtet Dimapur nung aliba lokti tentetemibo Nagaland nung yi ayoktsüla ta tangar yimsü amangba Nagaland angh dang dena shiogo. Iba takangba nungji asenoka dena lir. Nagaland Khrista asoshi ta asüba lima ka nung alir Khristan-temi limapur ka dang ozü lima nung yi yokdakjang ta ashibaji, ashiko, pa asoshibo meimlaba o ka ser alitsüa akok. Aji oda, kasa government nung yimsüsür Chakhesang nungbaibo kechi takoksa ajurudir ajuruang, Nagaland nung yibosa mayoktsüla, kechiyong sen dang nungibo nisung taküm taoba aser kibongji sentiba ta ashi dang, asenokibo Nagaland senpongi sen arutsü atema yi ayoktsüla aser yi tamajung ajemba nungi nisungtem kümzüktsü atema yi dokan lapoka yur yi tajung ayoktsüla ta jembiba ya Nagaland nung yi mayoktsü lumiba aser yi atakatamba kin nungi adokba lenirtemi jembibo memesük tangari angaa alitsüa akok. Atangji, yiji tajemtsü yanglu, anungji tajem shia jemdi süra ayokyonga kecha masü saka Aoribo Nagaland nung yi ayoktsüla tabo tebang nungi madoktsüla. Aji asenok dak mazü. Asenok asoshibo yi dang nungi tajungba yanglua nübortem mesütsü temoatsü lenmang aika Tsüngremi moaja lir. Aji oda, asenokbo yi yoka mamenyonga Tsüngremi moatsüba rongsen yokner meyokma lir, itemji asen shisa nük agi repringteta inyaktü nungdaker. Ajisüaka, tangar asen dang tesü temulung meyipertemi Nagaland yi kenyongi mayoktsüla ta nokdak dang, asenok mezüing arogotem tenzükba tamangertemi Nagaland nung yi ayoktsüla ta nokdakbaji Khristan yimsü aruba sülen atalokba tajungtazü temelenshi ka asütsü. Atangji, asenok dang masü Naga nung tiamajung, asenoki akhidang Yisui kümzüker ta ayimtenba ola to samaogo aser tangbo vote sen agi aliang, proxy vote bushiang, backdoor nungi asüyonga shimang aser yi yokdakjang ta asüba olatemang asenok ola kümogo. Item ola ya kong nungi tenzük ? Asenoki mapa meinyaki jangratema linüba, ita sen agi tenük masüing mashilen nungi side income bushiba aser sensakertem bang nungi rakzüka takar akümba anogotem to asenok ola melenba anogotem liasü. Item anogotem nungi asenok sensak aküm tenzük aser tangar tsüngdang akhüm sama. Bilemdangang, asenok mashilen nungi takar akümtsü merangba nisungtem rongnung shibabo takar ali ? Tangar teindangba akümer aser asenok meindangba akümer, tangar takarba akümer aser asenok tesensakba akümer, tangarbo tasü itta ochi jembir saka asenok tsübuseta tiyazü jembir. Tangar yi mayoktsü ajungshiteper saka asenokbo yi ayoktsü ajungshiteper. Aji oda, takar akümtsü atema yi yanglur-a asenok, tayoker-a asenok aser tajemertema asenok ta asütsüsa ajungshiteper asü ?

OLEMSABANG

Vote ajemtsüba kuli Election Office Mokokchung ajanga tejangja mesayutet

~ Odi Jamir & S. T. Yapang Lkr, Kohima.

Mapang shia vote ajemtsüa aruba ama, 2023 Oct 27 publication nung Changtongya litsü nung vote 402 kuli makai ajemtsü, anungji iba kuli tejangja metettsü asoshi RTI ACT ajanga Inspection sünua 12/12/2023 nung shiti ka yok, Mokokchung DC office nung ibaji 13/12/2023 anogo agizüka 2024 Jan 8 mesüra 9 nung repringteptsü jembitep, jembiba ama 9th Jan 2024 nung oa repringdangdang kuli kar agi matoksa nguteta liasü, ibanü langzüba RTI No.ELE/RTI/2023/198 Dated 9th January 2024 nung ashiba tatsütiba agi "23rd Nov 2022 nung Mokokchung District asoshi 9737 Photo Similar Entries (PSE) repringshitsü asoshi Chief Electoral Officer nungi shiti aru. BLO tem dangi ibaji yokner, BLO temi tsüngdong oa repringteper Garuda App ajanga osang yokba nungi ERO ajanga telemtetba agir, ERONet ya BLO temi yokba dak ajemdaker inyaker ashi ERO sasa inyaktü makoker." Ajisaka Changtongya nung aliba BLO temi PSE arubaji repringteper nisung tejangja alinungji Vote 402 tashi ajemtsüsaji yoka mali ta ashir, anungji ibai sabang balaka nung bendangba tajungba asütsü ta onoki apijem, kechiyong tamalena yamai ajemtsübaji lir.

Ano külen RTI ACT 2005 Sec 4. 1 Nübur tongti ketdangsür shiai-

(a) Osang angutsü asoshi temeten mapa nung yaritsü atema record ajak tatongi bendena ayutsü aser record ajakji Computer nung tekaratiba nung enoka ayutsü. Senotsü peria lira record-ji linük ajunga nung "network" ajanga inyakyim balala nung osangji melaa ngutettsüsa prokshitsü.

Ta shia lir, ajisaka Mokokchung Election Office nung yamaji bendena ayuba mangur. Vote delete/removed asüba kuli kecha yua maka, ERONet 1.0 amshia aliba 2023 May 10 nung ERONet 2.0 melen nungji app samaogo ta dang ashir. Alima kara ainba ama app-ji melenbet melentsü, iba shaji vote kuli makai ajemtsüli app samaogo ta süli ta dang asütsüji majung, anungji tang ya tatem kabo tongteta ayu ang ajak asoshi tajungba asütsü ta onoki imlar.

Iba vote ajemtsüba dak sentakba nung vote ajema alibaji list yanglur arung aser nisung tejangja lir sünung aibelena vote delete sütsüa lira aji meyipa enoktsütsü ta Mokokchung Election office nungi ashi, anungji "Nenoki vote delete sütsüli onok ibaji bendena bener arua inokli ta kazütsüba masü, shibai kechi kuli ajanga delete asü ibaji bushir tapet sabang nung obendangtsü, anungji onoki vote delete asübatemji bendena bener marutsü" ta dang shir yutsü, kechiyong vote ka enoktsübaji BLO temi supervisor nem agütsütsü, iba sülen AERO ajanga ERO dangi yokner ang vote ka inoktsü aji tim lenmang lir, Mokokchung district nung vote timi renloktsü asoshi onoki tang nungibo e-roll publication asüba shia RTI ajanga kulitem meshia bendena ayutsüsa akümtsü, ibaji ajak ajungtsü asoshi inyaker ta Department aser nüburtemi angatettsü imlar.

Vote delete asüba ya S. T. Yapang Lkr tenu tebuttsü shiba tanga kintsür lir, Aor sobaliba nung aliba ama laji Aotsür akümer asünungji Changtongya nung vote zülüok, 2023 General Election nung vote shitak liasü, ajisüaka 2023 Oct 27 adokba nung delete sütsür liasü, anungji ibai vote delete sütsüba kija masü sobaliba mezüingmeshiba densema lir ta bilemer. La delete asüba osang BLO tem den asüngdangtep nung la dang masü vote 402 delete sür arua liasüba osang angashia onoki iba mezüingmeshiba keno ya repringshitsüsa aküm.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Indonesia nung Arogo kati küm 15 sülen Tenla ki asentenshir asütsü



January 22, 2024 nü Indonesia kübok Padalarang sub-district nung St. Benedict Arogo Tenla ki asütsü atema kimong meshitetba sentong agidang tangokba noksa nung angur.

January 25, 2024: Indonesia nung Arogo kati küm 15 tejaklen Tenla ki ka asü tenzüka liasü, ajisüaka Muslim nunger kari ashishiba ajanga Tenla ki asütsü license ji thinenja liasü.

Ajisüaka maneni iba Tenla ki asütsü atema temelaba anguba sülen Tenla ki asentenshir asütsü atema maparen tenzüko.

January 22, 2024 nü Indonesian Bishops' Conference nung Tir aser putir, Antonius Subianto Bunjamin leniba nung Padalarang subdistrict nung St. Benedict Arogo Tenla ki asütsü atema kimong meshitetba sentong agiogo.

Iba sentong nungji Khristantem dang masü saka sorkar ketdangsertem-a aden.

Tenla ki construction committee nung chairman, Tri Basuki Joewono-i, "Padalarang, Cipatat, Batujajar, Ngamprah aser Cisarua nung alir Khristan 4,000 dak temai iba Tenla ki amshitettsü, ta onoki amanger,"

ta metetdaksü.

Paisa, "Joko tekülem sentong agitsü atema Khristantemi meta talanglang mejajatsü," ta ashi.

2009 küm Arogo nung ketdangsertemi West Bandung Regency nung mezüngbuba Tenla ki- St. Benedict Arogo Tenla ki asütsü telemtetba agia liasü saka license mangu.

Sorkar temzüng kübok, tesem ka nung Tenla ki densema yimsü balala amangertem tekülem ki asütsü atema kiyong nung alirtem ajaki melungtsü nungdak; yamaji asü nungang tekülem ki asütsü atema sorkari temelaba agütsür.

2006 küm Home Ministry aser Ministry for Religious Affairs nati tekülem ki tasen asütsü atema tamanger 90 indang signature aser kiyong nung alirtem indang signature 60 agitsü lemteta liasü.

Ajisüaka Khristantem densema minorities-ibo signature peria mengutetba

ajanga tekülem ki asütsü atema temelaba angutsü kanga tasak, kechiyong kiyong aika nung Muslim nunger nütsüng teimba lir aser parnoki Tenla ki tasen asüba anema nokdaker.

2015 küm Muslim nungertemi, Muslim nütsüng teimba aliba tesemtem nungbo Tenla ki asütsü memelatsü, ta metetdakja liasü.

Indonesia nung nütsüng teimba aliba province ji West Java lir. Iba province nung nütsüng million 49.94 lir aser nütsüng shilem 97.29 bo Muslim nungertem lir.

Iba province nung Muslim nunger tekülem ki 83,476 lir, Protestant Arogo Tenla ki 406 aser Catholic Arogo Tenla ki 77 lir.

Yaküm November ita nung Bekasi Regency kübok Cikarang nunga St. Theresa Catholic Arogo Tenla ki asütsü temelaba agüja liasü. Arogoi Tenla ki asütsü atema temelaba meshiba sülen küm 18 sülen ang temelaba angur.

Plateau State nung Khristan 30 dak tema tepset

Abuja, January 25, 2024 (Agencies): January 24, 2024 nü Nigeria kübok Plateau state nung Fulani telok aser kiralongrar telok balalai yimtsüng aika amakdang Khristan 25 tepsetogo; taoba hopta nunga Khristan 6 tepseta liasü.

January 22 nungi tenzüka kiralongrar telok balalai Khristantem amakba ajanga Mangu County nung nisung meyrjang aika jenshiogo.

Osangbener den jembidang Hosea Ibrahim-i, "Ozü yim, Kwahaslalek ya Khristantem yim ka lir. Bodhbar, January 24 anepdang züngia 12:30 ako meta kiralongrartem aser Fulani teloki ozü yim amak. Yimakertem jagi ayaterm nung ozü yim meketbangba sülen

injang khaloktsü. Tetsür-tanurtem teimba ser Khristan 25 kshasetogo," ta metetdaksü.

Brihostibarnü Nigeria Parliament nung Senator, Diket Plang-i sangdong ka ajanga, tai maket sensotem amakba ajanga nisung aika süogo, ta metetdaksüba den külemi sepaitem dang nenoki tenangzüka agia aliba ama senso ajak kümzüksü atema inyakang, ta metetdaksü.

Paisa ketdangsertem dang item tatalokba bushisüngdanga aibelenertem nem temerenshi agüjang, ta ayongzü.

Plateau State Command, Alfred Alabo-i, tangbo iba tesem nung tensa azüokogo aser aibelenertem aputsü atema police yokogo, ta

metetdaksü.

Hombar (January 22) nungi tenzüka kiralongrartem Mangu County kübok Kwahaslalek, Marian, aser Kinat yimtsüngtem aser Jakatai, Sabon Gari aser Mangu jilatem amak.

Osangbener den jembidang Khristan kati, "Mangu jila nung ozü medemer ka kibong nungbo züngsem pongu tashi rongseta asü. Iba ya tapi agi amakba masü saka Khristantem samatsütsü nükjidong nung inyakba lir," ta metetdaksü.

January 17 nü Bokkos County nunga Fulani telok aser kiralongrartem Khristan yim ana- Butura Kampani aser Gada na amakdang Khristan trok kshaset.

ANOGO ABEN TSÜNGREM DEN

Taküm tasen

Anungji nisung kar Khrista nung lira, pa tasen poktetba. Tejenbaji süiogo, ajiang, ajak tasen kümogo. 2 Korint 5:17.

Yisu ne mulungi aitang ta asüngdangba agi na khristan ka maküm. Kodang na tanaben aso, na Khristan ka aküm. Yisui ashi, "Atangji Züngpung ni ne dang shidi, tanaben mesora, nisungi Tsüngrem yimli mungutettsü" (Yn. 3:3). Sarasadem ka ashiba mesüra yimjak nung telemtetba agiba mesüra telemtetba agi card ka sign asüba agi na mekümzüksü. Tanaben asoba agi dang aji inyaktsü akok. Tenyar Pauli ashir, kodang na "Khrista nung lidir" tejenbaji süitemer. Na tekümtet anguba anogo nung nai menaa aliba temenentem ajak adoker. Yirur na timtema aruba ajak tanebtsü angur. Nai tamakok ngua arua liaka temeim aser agizükba ne meyong akümer. Timtem tekangshi ajak joko mali moatsür.

Kari na tanela nung tanaben asoba tesüngmangtsüji nemea kümdaktsütsü ashiba nai angashitsü akok. "Tang na "Khristan süa nai tesüiba nung kechisa ajangshia aru ajakji ajangtsü aser ibaji akoktsü mapang agitsü" ta mesüra, "Na tanaben asotsü akok saka maneni na temenen den rarateptsü, aser nai ne tashi mait nung takok angutsü ta yimlar.

Tebilemstüji shibai na tanaben sodaktsür pa dangi asen taküm aotsü melen aseni merangba agi tanaben asotsü merangbaji lir. Na temenen nungi nüji akümstü asoshi Laishiba nung tabensa kuli agütsübaji Yisu Khrista aser Tsüngremer chir asütsübaji teperi. Satani ibaji masü ta na mesüzüksü bushir. Shiba dang nai amangtsü?

Sudan linük nung Muslim nungertemi Tenla ki ka rongdoktsüogo

January 24, 2024: Sudan kübok Wad Medani yimti nung Muslim nunger yimsü alia amangertemi Tenla ki ka rongdoktsüba sülen anogo Rapid Support Forces (RSF) züngsemtemi Sudan nunger Khristan, Karbino Bla tepset.

Sudan Presbyterian Evangelical Arogo nung pastor-i, "RSF telok nung Islam yimsü alia amangertem aika lir. Ni parnok karbo Khartoum aser Medani nung ajuruogo. Ni pastor inyaker, ta parnoki metetba sülen parnoki ni amokmerena liasü," ta metetdaksü.

Yaküm November ita tetenzüklena Sudan nung küm 81 tejaklen asüba Church of Savior Tenla ki bomb agi poksaja liasü.

2019 küm Sudan Tir, Bashir menden nungi atsüngdokba sülen nungi linük nung tensa tamajungba aküm. Tang Sudan nung sepa telok ana- Sudanese Armed Forces (SAF) aser Rapid Support Forces (RSF) na tsüngda rarar.

(CPC) list nunga küm 18 tashi Sudan linük züngsema liasü, kechiyong iba linük nung yimsü temeden anema inyaker aser Khristantem kanga reshikangshir.

Omar al-Bashir yimsüsüba kübok linük nung Islamic Sharia ozüng sashia benoka liasü, saka pa menden nungi atsüngdokba sülen yimsü melentsü atema sensotem nem temeden agütsü. Sorkar melenba aser yimsü dak sendakba ozüngtem melenshiba agi USCIRF-i CPC list nungi Sudan agien aser tangbo Special Watch list nung ang züngoka lir.

Ajisüaka tang Sudan nung sepa telok ana tsüngda raradang Tenla kitem aika poksatsüogo aser sepaitemi Tenla ki aika atsüngbanga agir.

Yaküm May ita nunga RSF sepaitemi Khartoum nung Tenla ki ka agi aser Coptic Orthodox Arogo Tenla ki ka military headquarters ama amshidar.

Sudan nung Khristantemi anogo shia taküm lendong ajangshir, talisa tekülem kidangi aotsü atema arendaker, kechiyong mapang shia Tenla kitem amaker.

AO OSHI ANGAZÜKDAK:
TANÜ ANGAZÜKTSÜBA OJANG



Shisalemsa

(adv) shisatsü agütsütepba (sharing of ideas)

* Asenok rongnung teti shisalemsa mapang agitsüla.

Shisaliok

(n) bushiba ajanga anguba tangatetba (education)

* Shisaliok ajanga nisungtem libaliru nung nüchi akümer.

OLONG PAITEP # 6678

Grid for crossword puzzle #6678 with numbered squares.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S _ _ _ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzüma nung senzüba - (5)

OLONG PAITEP # 6677 TELANGZÜBA

TIPIEN :

- 2. Bangsemo, 6. Tiptem,
8. Jen, 9. Talilla, 11. Aren,
12. Tzübo, 14. Alia, 16. Angati,
17. Odi, 18. Azü,
19. Sünglang.

LANGTSÜNGLEN :

- 1. Yipten, 3. Nüja, 4. Sangro,
5. Milen, 7. Tulu, 10. Laza,
11. Aben, 12. Tiyong,
13. Ajizük, 14. Aitsü, 15. Tasa,
16. Aina.

NAI-A YA METETTER MA



26th JANUARY
REPUBLIC DAY

January 26, 1950 nung Constitution of India agizükba bilemteta küm shia Republic Day ya January 26 nung amunger. India ya British nung ket nungi 1947 küm nüchiso angu, saka January 26, 1950 nungi ang Constitution of India amshi tenzük aser linük ya sovereign state kuma pei sasa pei lenir shimtsü sangdonga liasü.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

ITLF-i Manipur govt aitsü; President's Rule benoktsü akhang

Imphal, Aenjeti/January 25 (Agencies): Indigenous Tribal Leaders' Forum (ITLF)-i, MLA aser MP tem Meitei nung telungpur telok Arambai Tenggol-i ayongba sentong nung shilem agitsü melaba atema Manipur aser central sorkar aitsüogo.

ITLF-i ashiba agi, kecha tai maketba civilian tem amakba telok kati chief minister N Biren Singh densema Manipur nungi ozüng yanglurtem nem parnoki ayongba senden ka nung shilem agitsü atema tetuyuba agitsü aser MLA tem nem parnok takhangba pusemdakja liasü.

"Arambai Tenggol lenir Korounganba Khuman police gari ka nung mener Imphal

nung senden amenba tesemi aruba mapang Manipur state police aser central security force temi ola madoki repranga ata aser iba telungpur telok yagi MLA tem tenangzüktepba agiba sentong ayongzüka agi," ta ITLF-i metetdaksü.

"Item ajak ya centre sorkari yokba special team ka matsüngdang atalok, shirnok yimti anasa anenzüker liasü. Kechiba alima nung democracy tulutiba iba ya atalokdaksü?" ta kasa sangdong ajanga ashi.

"Khuman ya tesülen nungi meima mapa inyakba nisung ka masü. Pai mapangshia assault rifle tem amer tangokba noksa aser video tem lemsateper aser pai tribal tem amaksü asoshi mapangshia ayongzüker," ta

ITLF-isa ashi.

"Centre sorkari iba nisungba anema kechiba kecha jenjang magir? Iba den Arambai Tenggol züngsemtemi armoury tem nungi auyaba sophisticated prangbongtem kechia memeimshi-i sayuba video tem aika lir. Parnoki sorkari issue asüba prangbongtem meimshitsüla ta-a kecha bilema mali.

"Tanü sentong ajanga Manipur sorkari parnok tashi telungpur telok ka nem bendanga agütsüba sayuogo. President's Rule benokba ajanga dang centre sorkari Manipur nung tensa aziüoktetsü. Tang mebenokra kodang benoktsü?" ta ITLF-isa shisem.

Sepai tanungba 92 Myanmar-i meyipa yokogo

Aizawl, Aenjeti/January 25 (Agencies): Myanmar military indang tayimtsü ka Aizawl anasa Lengpui airport nung tsükoka anenba sülen anogo ka lir Myanmar nung sepai tanungba 92 Bodhbarnü kidangi meyipa yokogo, ta Assam Rifles ketdangsür kati metetdaksü.

Mongolbarnü tsükokba tayimtsü nung Myanmar army personnel aser crew members 14 mena liasü aser parnok ya Lengpui nungi Rakhine state kübok Sittwe port town-i Myanmar indang tanga tayimtsü ka nung anirogo, ta ketdangsürisa shisem.

Bodhbarnü sepai 92 anir aoba sülen ajak senteper Myanmar nung sepai 635 taoba küm November ita nungi tenzüka Mizoram nungi par

linüki anirogo.

Myanmar nung telungpurtem aser democratic force temi sepaitem indang camp tem maktoka aoba sülen Myanmar nung sepaitem ya international arrtsü ajanga Mizoram-i aita liasü.

November ita Mizoram kübok tesem balala nungi Myanmar nung sepai 104 Indian Air Force (IAF) indang helicopter tem nung Manipur kübok arrtsü nung aliba Moreh jila-i anir oa laisü. Kasa mapang nung sepai 225 Myanmar Air Force tayimtsütem agi January 2 aser January 9 nü Lengpui airport nungi anir ao.

Ano Hombarnü sepai 184 Sittwe nungi tatimtsü nung anirogo.

Myanmar military, koba sepaitem ani-i arua liasü, iba

tayimtsü ya Lengpui airport nung Mongolbarnü runway adena oa chiokba sülen nisung ti tashi yirua liasü.

Ajisüaka crew members 14 aser pilot ajak tasübo masü jenbuogo.

Kasa mapang nung ketdangsürtemi ashiba agi, Mongolbarnü tsükokba Myanmar indang tayimtsü ya China nung yangluba liasü ta jangaogo.

Parnoki ashiba agi, engine tachichilen mapa minyaki aküm aser iba yongji lendong ya ajuru asütsü akok, kechiyong pilot-i aibelenba ajanga lendong ajuru asütsü tabo mebilemer.

Myanmar sorkari China nung yangluba tayimtsü aika alizükogo aser item tayimtsütem ya mapangshia tsükoker, ta ketdangsürtemisa ashi.

Manipur nung kozü shibelener 17 apu

Imphal, Aenjeti/January 25 (Agencies): Manipur nung shibelenerntem asütsü ta temulung melemer nisung 17 puogo. Parnok yagi kozü juli 1,205 bener liasü, koba shishilembadak sen crore 11.568 alang asütsü.

Item nisungtem yagi tenüngdakba kuli kaketem bena maliba ajanga Manipur nung Kamjong district kübok tesem ka nung pua liasü, ta ketdangsürtemi metetdaksü.

Shanklok aser Kangpat Centre tesem nung kozü aser sung ozüng alema belenshiba indang osang tejangja ka angazükba sülen Assam Rifles sepaitemi meita aoba sentong ka ayongzüka agi.

Meita aoba sentong ayongzüka agiba mapang tata gari 17 puogo, koba ozüng alema kozü belentsü atema amshia liasü.

Kanga junga bushisüngdangba sülen kozü juli

1,205 apu koba tone 96.4 shi liasü aser shishilembadak sen crore 11.568 asütsü.

Kozü apuba sülen Kamjong District Forest Beat Officer nem bendanga agütsüogo, ta ketdangsürtemi sa metetdaksü.

Kasa mapang nung AR defense wing-i ashiba agi, iba inyakyim ajanga ozüng raksartem inyakyim raksatsüba dang masü saka iba tesem nung Assam rifles bendanga agütsür aliba sayur.

**GOVERNMENT OF NAGALAND
DIRECTORATE OF ART AND CULTURE
NAGALAND: KOHIMA**

No. AC/PL/476/2022-2023

Dated Kohima, the 25th January, 2024

NOTIFICATION

- (I) This is for information to all Libraries run by non Government Organisation/Trust etc to fill up a prescribed format available at the Offices of the respective District Cultural Officers, under the Department of Art and Culture, Government of Nagaland. Recognition Certificate will be issued on fulfillment of the required criteria as recommended by the Raja Rammohun Roy Library Foundation, Kolkata.
(II) All Rural Libraries registered under the Department of Art and Culture, Government of Nagaland, are therefore requested to collect the prescribed format, and submit the details of their Libraries to the respective District Cultural Officers, on or before 31st March, 2024.
(III) It is further notified that recognition of the Libraries will be renewed every year after proper inspection about satisfactory functioning and services provided by the concerned libraries.
(IV) All NGO Libraries must also be registered in the NGO Darpan system (https://ngodarpan.gov.in/) of the Government of India and the unique ID generated from the NGO Darpan has to be mentioned.

Sd/-
Director,
Art and Culture, Nagaland, Kohima.

**STATE HANDLOOM EXPO (SHE)
HATHKARGHA MELA**

IMKONGMEREN SPORTS COMPLEX
MOKOKCHUNG TOWN, NAGALAND

10 AM - 05 PM 2nd TO 15th FEBRUARY, 2024

"MY HANDLOOM, MY PRIDE"

EXPERIENCE ARTISTRY, UNCOVER HERITAGE, SHOP UNIQUE CREATIONS

Organised by Directorate of Industries & Commerce, Govt. of Nagaland
Sponsored by Development Commissioner (Handlooms), Ministry of Textiles, Govt. of India

Mulungnen O

TASOBA :
03.03.1926

TASÜBA :
19.01.2024

Onoki teti meima aliba Ojala **Asür Tiamensula** (Kangtsüng) la shiranga aliba mapang nungi Kibubai jar aoba anogo tashi, shirnokisa nübo, rongsen aser sarasadem agi yaritepogo, nenok ajak dang kangasa pelaba lemsateper.
Takoksang Tsüngremi nenok ajak moajangma ta onok tamang sarasadem.
- *Chirnur aser Kinungertem.*

**GOVERNMENT OF NAGALAND
DIRECTORATE OF TECHNICAL EDUCATION**
Nagaland : Kohima - 797 004

NO.DTE/ESTT-2/5/2016-17/5575 Dt. Kohima, the 25th January 2024

NOTIFICATION
This is to inform all concerned that the State has received 1 (one) seat for admission in the Degree Module for In-service candidates for the academic session 2024-25 at North East Regional Institute of Science and Technology (NERIST), Itanagar, Arunachal Pradesh. The guidelines for the allocation are given below.

Sl. No	Particulars	Requirements
1	Branch of Studies	Civil Engineering
2	Duration	3 (three) years
3	Minimum Qualification	3 Years diploma in Civil engineering with minimum 60 % in aggregate from the Institute approved by AICTE.
4	Maximum age	The candidate's age should not be more than 40 years (45 years in case of SCT/ST and PH and 43 years in case of OBC and women) as on 01.08.2024
5	Certificate of Undertaking	From the concerned Department that the candidate shall be sponsored for 3 (three) years.

Candidates may submit an application letter to the undersigned on or before the 8th of March 2024. Selection shall be done purely on the basis of academic performance.

Sd/-
(Er. VIPULHOU LHOUNGU)
Director

Mulungnen O

Lt. Tongpangnungba Jamir
15th Feb.1947 - 19th Jan. 2024

Temeim obala shirangba mapang nungi pa ali mapa renemba anogo tashi nung temeimertem kwikati ozü kibong nungita yariogo, nenok ajak dang onoki kanga pelaba lemsateper.
Tsüngremi nenok temeim mapatem asoshi maneni moshia moajangma.
- *Temeim Kinungtsü, Chirnur, Semchirtem aser Kinungertem.*

NATO nung Sweden züngsem akumtsü Turkey-i mulunger Ankara, Aenjeti/January 25 Turkish MP temi vote agüja melaogo, aser ibai Nordic linük iba tentet nung züngsem akumtsü atema mapang talangka menur akumtsü atema mera tuluka alitsü.

पंजाब नैशनल बैंक Punjab National Bank

Circle Sastra: Imphal
Kwakeithel Thokchom Leikai, Imphal
E mail: cs946700@pnb.co.in

SALE NOTICE FOR SALE OF IMMOVABLE PROPERTIES

E-Auction Sale Notice for Sale of Immovable Assets under the Securitization and Reconstruction of Financial Assets and Enforcement of Security Interest Act, 2002 read with provision to Rule 8 (6) of the Security Interest (Enforcement) Rules, 2002. Notice is hereby given to the public in general and in particular to the Borrower (s) and Guarantor (s) that the below described immovable property mortgaged/charged to the Secured Creditor, the constructive/physical/ symbolic possession of which has been taken by the Authorized Officer of the Bank/ Secured Creditor, will be sold on "As is where is", "As is what is", and "Whatever there is" on the date as mentioned in the table herein below, for recovery of its dues due to the Bank/ Secured Creditor from the respective borrower (s) and guarantor (s). The reserve price and the earnest money deposit will be as mentioned in the table below against the respective properties.

Sl. No.	Name of the Branch	Description of the Immovable Properties	A) Dt. Of Demand Notice u/s 13(2) of SARFAESI ACT 2002 B) Outstanding Amount as per respective demand notice C) Possession Date u/s 13(4) of SARFESI ACT 2002 D) Nature of Possession Symbolic/ Physical	A) Reserve Price (Rs. in Lakhs) B) EMD (last date of deposit of EMD) C) Bid Increase Amount	Date/ Time of E-Auction	Details of the encumbrances known to the secured creditors
1	Dimapur (045120)	All the part and parcel of Landed property measuring 00B-03K-07Ls in the name of Smt Malemla Imlong, under Patta No.8, Dag No.246, Mouza No-02, Block No-04 which is butted and bounded on the North :by Land of KV Pusa, on the South:Land of Chakesang Group Society, on the East:Land of Shri Angami, on the West:Duncan (Circular) Road	A) 20.04.2022 B) Rs.17,76,810.00/- + further interest C) 04.09.2022 D) Symbolic	A) Rs.170.82Lakhs B) Rs.17.08 Lakhs, 23.02.2024 C) Rs. 0.20 Lakhs	24.02.2024 From 01:00 PM to 04:00 PM	NIL

TERMS & CONDITIONS

The sale shall be subject to the Terms & Conditions prescribed in the Security Interest (Enforcement) Rules 2002 and to the following further conditions:

- The properties are being sold on "AS IS WHERE IS BASIS" and "AS IS WHAT IS BASIS" and "WHATEVER THERE IS BASIS"
- The particulars of Secured Assets specified in the Schedule hereinabove have been stated to the best of the information of the Authorized Officer, but the Authorized Officer shall not be answerable for any error, misstatement or omission in this proclamation.
- The Sale will be done by the undersigned through e-auction platform provided at the Website <https://www.mstcecommerce.com> on from 01:00 AM to 04:00 PM.
- For detailed term and conditions of the sale, please refer www.ibapi.in, www.tenders.gov.in, www.mstcecommerce.com <https://eprocure.gov.in/epublish/app>

Place: Imphal
Date: 25.01.2024

Authorized Officer Punjab National Bank Secured Creditor

STATUTORY SALE NOTICE UNDER RULE 8(6) OF THE SARFAESI ACT, 2002

Russia-i tashi ajak amshia Ukraine amak tenzüikba sülen Sweden-i NATO nung adentsü 2022 küm asüngdanga liasü, saka Sweden-i Kurdish separatists yariba mechi Turkey-i temelaba soita aru.

Turkey Tir Erdogan-i anogo ishika tsüngta legislation nung meyongnem agütsütsü imlar.

Anungji Sweden anioxtsü memulungi aliba NATO züngsem linükji Hungary dang akumer.

Sweden Ato Kilonser UIF Kristersson-i social media post ka nung, "Tanü asenok NATO züngsem akumtsü mera ka anasai aor," ta zülua liasü.

NATO Secretary General Jens Stoltenberg-ia Turkey vote ya pelashishia agizük aser Hungary-ia tekeraba nung temelaba agütsütsü maparen tembangtsü imlaa atar ta ashi.

Sweden-i tsükchir ama yimya meshidak amshir, ta Hungary-i aitsür. Sweden ketdangsürtem ya 'moral superiority' indang chuba menden telaor alidak mena lir, ta taoba küm March ita Hungary sorkar indang odongtar Zoltán Kovács-i tai tonglokja liasü. Stockholm-ia Hungary sorkar ya EU indang democratic principles nung tamajungleni atsüngzüika aor ta tai tonglokja liasü.
(Maneni tapak 8 nung...)

Australian Open: Bopanna-Ebden na aser Aryna final-i iogo

Aenjeti/January 25, 2024 (Agencies): Australian Open tebur tarep final-i aiba sülen Rohan Bopanna asoshi ano Grand Slam ka akoktsü maongka ngutetogo.

Brehostibarnü Bopanna aser pa indang Australia nunger partner Matthew Ebden nati semifinal nung Tomas Machac aser Zhang Zhizhen na koka final tongtetogo.

Asaya nung tarep ana ya tasembuba set nung kanga tontepa asayaba sülen Bopanna aser Ebden nati asaya 6-3 3-6 7-6 (10-7) agi koka liasü. Parnok tsüingda asaya ghonda ana sür minute ana asaya liasü.

Zhang (WR 54) aser Machac (WR 75) nprongla ya

kija asayar lir aser tenaprongla top-100 list nung lir. Tenati baseline nungi kanga ajanga azükba ajanga Bopanna aser Ebden asoshi mapa tasakba kümdakja liasü.

Kasa mapang nung Bopanna tebur tarep asaya nung temaba jenjangi tua otsü tasen ka yangluogo, ajisüaka pai tebur tarep asaya nung tang tashi nung Grand Slam ka danga koka mali. Pai 2013 aser 2023 küm US Open final bo tonga asayaogo.

Pa arishi küm 43 jungogo aser career tatembang ka dangi aruba mapang Honibarnü iba asayamung koka Grand Slam ka danga akoktsü maongka lir.

Kasa asayamung tetsür kija asaya mezüingbuba semifinal

nung world No. 2 Aryna Sabalenka-i Gauff koka final-i iogo.

Brehostibarnü iba asaya ya Sabalenka-i 7-6 (2), 6-4 agi straight set nung koka liasü. Tena tsüingda ghonda ka sür minute 42 asaya liasü.

Taoba küm US Open final nung Sabalenka-i Coco Gauff mekoki liasü saka iba asaya nung mang yangogo aser la küm anabuba atonga Australian Open final-i iogo.

Iba asaya akokba sülen arishi küm 25 tain asaya ya Serena Williams-i 2016 aser 2017 küm atonga final tongtetba sülen iba asayamung küm anabuba atonga final tongtetba mezüingbuba asayar kümogo.

Kohli nem ICC Men's ODI Cricketer of the Year Award agütsü



Aenjeti/January 25, 2024 (Agencies): India nunger nungtugu cricket asayar Virat Kohli nem ICC men's ODI Cricketer of the Year award agütsüogo. 2023 küm pai kanga junga asayaba atema iba naroküm agütsüogo.

Taküm densema Kohli-i iba naroküm küm pezübuba atonga agizükogo. 2023 küm Kohli ya ODI nung run timtiba yangluba asayartem rongnung tanabuba

liasü. Pa jakdang külem India nunger asayar Shubman Gill lir.

Küm tepeyong nung taoba India team captain yagi ODI asaya nung run 1,377 yanglu. Pai century trok aser half-century ti yanglua liasü.

Maneni 2023 küm ya Kohli asoshi kanga dang tongtibang kuma ka liasü, kechiyong pai taoba mapang asayar Sachin Tendulkar ajateta ODI nung century timtiba yangluba asayar kümogo. Pai jurila alizüing tasen tongtetba den külemi India team nema teyari tulu agüja ODI World Cup nung team final tonga ania liasü. Iba asayamung nung pai asaya 11 nung run 765 yanglua Player of the Tournament naroküm agizüka liasü.

Iba naroküm asoshi Kohli den külem India nunger asayar Shubman Gill aser Mohammed Shami na aser New Zealand nunger asayar Daryl Mitchell nungera shima liasü.

Ni asaya nungi anenba ano mesangdong: Mary Kom



Aenjeti/January 25, 2024 (Agencies): Nungtugu India tsür boxer MC Mary Kom-i Brehostibarnü ken o jangjashija, la asaya nungi anenba ano mesangdong ta shiogo. Brehostibarnü internet nung la asaya nungi anenba indang osang prokshiba sülen lai ken o jangjashija liasü.

"Media balala nung Medemertem, ni asaya nungi anenba ano mesangdong aser ni jembiba mashi angatetba dang

lir," ta Mary-i ashi.

"Ni asaya nungi anenba sangdongtsü atema ni kü sasa media dangi arutsü," ta lai shisem.

"Media osang kar ajanga ni ni asaya nungi anenba sangdongogo ta ashiba ni angashiogo, koba shitak masü," ya arishi küm 41 tain asayar yagi ashi.

"Ni January 24 nü Dibrugarh nung school sentong ka nung shilem agia liasü, kong ni tanur

tem ajungshia liasü. Ni parnok dang ni asaya nung takok nguyonga aotsü ano tejangraba lir, saka Olympics nung küm tatakzük aliba ajanga ni jangraka shilem magitetsüsa kümogo ta ashi," ta Mayr-isa shisem.

"Ni maneni fitness dak rangloker inyakdar aser ni asaya nungi anenba mapang ajak dang sangdongtsü. Yimlibilema iba ya metongshiang," ta Olympic medalist yagi ashi.

Manipur nungi asayar ya India nung kanga dang nungtugu asayar ka lir shiba international jenjang nung takok tajung nguteta boxing asaya nung temelenshi bener aruja liasü.

Lai 2012 London Olympics nung 51 Kg category nung bronze medal ka ngua la alima ajungai meteta aküm. Laisa, Boxing World Championships trokben tashi kokogo aser 2014 Incheon Asian Games nunga gold medal nguogo.

Laisa, 2014 küm Commonwealth Games nung gold ngua liasü.

KDFA-i tatembangbuba selection trial ayonger

Kohima, Aenjeti/January 25 (TYO): Kohima District Football Association (KDFA)-i sangdong ka ajanga, Nagaland Olympics aser Dr T Ao Inter-District trophy atema tatembangbuba selection trial January 27 nü 12:30 ako nungi

tenzüka IG Stadium Kohima nung agitsü ta metetdaksüogo.

Asayartem shirnoksa selection trial ajangetetogo parnok dang iba trail nung tamakok malui arua shilem agitsü asoshi KDFA-isa metetdaksüogo.

Ashwin & Jadeja nati Kumble-Harbhajan ajatetogo

Aenjeti/January 25, 2024 (Agencies): Spinner Ravichandran Ashwin aser Ravindra Jadeja na Test asaya nung India nunger rongnungi wicket timtiba agiba tarep kümogo.

Hyderabad nung Brehostibarnü England den mezüingbuba Test asayaba mapang tena senteper wicket pezü agi tenati nungtugu Anil Kumble aser Harbhajan Singh na partnership ajatetogo.

Ashwin aser Jadeja nati Test asaya 50 nung wicket 504 agia Kumble aser Harbhajan nati Test asaya 54 nung wicket 501 agir aliba ajatetogo.

Iba alizüing tongtetba sülen tena ya India nunger cricket asaya puti otsü nung bowling tarep tajungtiba rongnung ka kümogo.

Harbhajan Singh aser pacer Zaheer Khan nati Test asaya 50 nung wicket 474 agia tena

tasembuba jenjang nung lir.

Alima nung England nunger tarep James Anderson aser Stuart Broad nati wicket timtiba agir lir, tenati asaya 138 nung wicket 1039 agir lir. Tena sülen Australia nunger Shane Warne aser Glenn McGrath na lir, tenati asaya 104 nung wicket 1001 agir lir.

Mezüingbuba Test nung Ashwin aser Jadeja na senteper England nunger asayartem tejakdangi meyoki sota yuogo.

Mezüingbuba innings nung mezüing batting amenba sülen England nunger asayartemi asayar ajak out sür run 246 dang yanglutet.

England-i iba asaya atema team nung specialist spinner asem shimok aser Root-ia part-time bowler ama teyari agütsütsü.

Kasa mapang nung India team-ia asayar ka out sür run 119 yanglur mezüingbuba anogo tembangogo.

NATO nung Sweden züingsem akumtsü... (Tapak 7 nungi...)

Ajisüaka terenlok aliba ajiteter. Mongulbarnü Hungary Ato Kilonser Viktor Orban-i Sweden ato kilonser jembishinütsü atema Budapest-i jaoka liasü aser kanga junga jembishinüba ajanga tamang tali kateptsü ta shia liasü.

Sweden Foreign Minister Tobias Billstorm-i tang Hungary den negotiate asütsü kuli kecha mali ta ashi saka linük ana tsüingta maneni jembishinütsü ta shia liasü.

Sweden ya NATO nung adentsü application agütsüba Turkey-i July ita tashi nokdanga liasü aser iba mapang tezüingzüktep ka yanglu.

Mongulbar nikongdang NATO nung Sweden züingsem

asoshi vote agütsütepba nung mulunger 287 aser memulunger 55 liasü. Tir Recep Tayyip Erdogan-i iba legislation nung meyongnem agütsütsü imlar.

Sweden-i Kurdish telungpur nem jenokdak tesem agütsür aser Kurdistan Workers' Party (PKK) ama sorkar anemba telok nokdangtsü asoshi mapa tali inyaktsü nungdaker ta Turkey-i shia arur. Turkey-i PKK ya kiralongraba telok ka ama züingshir. EU aser US natia PKK ya kiralongrar telok ta sangdonga lir.

NATO nung züingsem linük 31 lir aser iba telok nung linük tasen adentsü merangba nokdangtsü züingsem linük ajak

dak tashi lir.

Saka Sweden-i June ita kiralongrar anema ozüing tesashiba benoka kiralongrar telok nem senotsü mesüra osettsüset teyari agütsüba ozüing alema inyaker kumdaktsü.

Sweden aser par anüdoklen kidanger Finland ya mapang talangka nungi military neutral am alia aru, saka Russia-i tashi ajak amshia Ukraine amak tenzüker ita ishika lir May 2022 nung NATO nung adentsü tejangraba sangdonga liasü.

Finland bo iba alliance nung April ita züingsem kumogo, anungji Russia den alliance indang arütsü talangka akumer.

ALI AYOKER
AT AOYIMKUM
 Rs. 250 per sq. feet
 Two minutes walk from Futsal ground, Indisen
 Contact: 9856 278136

BILEMDANGANG
 "Temelenshi maginertem tejakleni maoer."